

HADIS *TARGHIB* DAN *TARHIB* DALAM ISU PENAGIHAN DADAH

Dr. Rosni Wazir, Dr. Abur Hamdi Usman, Dr. Norsaleha Saleh, Suriani Sudi, Abdul Hadi Awang,

Syamim Zakwan Rosman

rosni@kuis.edu.my

Fakulti Pengajian Peradaban Islam
Kolej Universiti Islam Antarabangsa Selangor (KUIS)

Abstrak

Pertambahan bilangan penagih dadah dalam masyarakat pada hari ini amat meresahkan meskipun pelbagai pendekatan pencegahan dan pemulihan telah diambil untuk menyelesaikan isu ini. Antara yang sering dibincangkan ialah pendekatan agama. Ketidakseimbangan di antara kemajuan negara dan kerohanian dalam pembentukan jati diri masyarakat pada hari ini menyebabkan masyarakat terlibat dengan penagihan dadah. Dalam menangani isu berhubung penagihan dadah, peranan agama adalah amat penting khususnya dalam merawat sisi spiritual golongan sebegini. Setiap agama mempunyai kaedah terapi pemulihan dadah tersendiri. Kaedah ini mengurangkan bilangan penagih dadah dalam masyarakat. Hadis nabawi sebagai sumber rujukan kedua dalam Islam selepas al-Quran mempunyai peranan yang penting dalam menyelesaikan kemelut umat Islam. Justeru, berdasarkan metode kualitatif kepustakaan, artikel ini mengupas isu penyalahgunaan dadah menurut hadis nabawi berdasarkan konsep targhib dan tarhib. Konsep targhib dan tarhib dapat memberikan pandangan yang luas terhadap sesuatu permasalahan kerana konsep ini diaplikasikan oleh Nabi SAW dan meliputi seluruh aspek dakwah baginda. Dapatan artikel ini menunjukkan terdapat beberapa hadis targhib dan tarhib yang sesuai dijadikan pemangkin kepada pemulihan penagih dadah dan panduan buat masyarakat dalam menghadapi isu ini. Oleh yang demikian, menyantuni dan mendekati komuniti penagih dadah berdasarkan bimbingan hadis Nabi Muhammad SAW merupakan suatu langkah berhikmah terhadap golongan ini.

Kata Kunci: **Pemulihan Dadah; Hadis; Rohani; Targhib; Tarhib.**

1. Pendahuluan

Isu penagihan dadah umpama barah dalam masyarakat yang semakin parah bermula pada awal tahun 1970-an. Sehingga hari ini ia masih belum dapat diatasi malah bertambah rumit dan kritikal. Sehingga kini, tidak ada vaksin atau ubat yang benar-benar mampu untuk memulihkan penagihan dadah.

Menurut data daripada Agensi Antidadah Kebangsaan (AADK) statistik penagih dadah adalah semakin bertambah semenjak 2010 sehingga 2016 (KDN, 2016). Paling merisaukan, statistik yang dikeluarkan oleh AADK menunjukkan penagih Melayu mendominasi sehingga 80.73% berbanding bangsa lain. Pada tahun 2012 jumlah penagih Melayu adalah 11,612 orang (76.90%) dan melonjak kepada 24,901 orang (80.73%) pada 2016. Malah, adalah tidak sepatutnya sebagai orang Islam kerana peratusan dari bangsa lain seperti Cina dan India menunjukkan penurunan, masing-masing dari 10.97% kepada 7.07% dan 9.40% kepada 7.87%. Sekiranya diteliti daripada statistik tersebut penagih berulang di kalangan orang Melayu juga adalah tertinggi iaitu sebanyak 79.03% berbanding Cina dan India, masing-masing 8.78% dan 10.68%. Statistik ini menunjukkan satu tanda yang amat membimbangkan. Jika keadaan malapetaka penagihan dadah ini berterusan ia akan mengancam kestabilan politik, ekonomi dan sosial negara kita.

Agensi Antidadah Kebangsaan (AADK) adalah sebuah agensi kerajaan di bawah Kementerian Dalam Negeri (KDN) yang menguruskan hal-hal berkaitan penyalahgunaan dadah di Malaysia. AADK merupakan agensi utama yang memainkan peranan dalam usaha kerajaan untuk mewujudkan negara Malaysia yang bebas daripada ancaman dadah menjelang tahun 2015 atau

tahun sifar dadah. Oleh itu, AADK telah memperkenalkan program transformasi dengan matlamat dan lonjakan yang lebih besar dalam menangani isu penagihan dadah ini, malah dengan perbelanjaan yang lebih banyak iaitu melebihi RM300 juta setahun. Proses pemulihan dadah juga melibatkan Pemulihan Dalam Institusi seperti Pusat Integrasi Klien (PIK), Cure & Care Services Centre (CCSC) dan Caring Community House (CCH). Ia juga melibatkan perkhidmatan Pemulihan Dalam Komuniti yang dilaksanakan oleh Cure & Care Rehabilitation Centre (CCRC) dan Klinik Cure & Care 1Malaysia (C&C) (AADK 2016).

Kaedah dan rawatan yang berasaskan ajaran Islam sudah diterapkan dalam sebahagian rawatan oleh AADK. Sebagai contoh, perkhidmatan Program Kerohanian dan Keagamaan di Caring Community House (CCH). Rawatan yang berasaskan ajaran Islam seperti taubat, kemudian diteruskan dengan solat, zikir, wuduk, usrah, kelas-kelas pengajian dan kuliah, bimbingan al-Quran dan fardhu ain, malah ada yang menggabungkannya dengan kaedah tasawuf. Peranan agama dalam mengisi sisi spiritual individu, menguatkan jati diri dan mengembalikan keyakinan semestinya tidak dapat dinafikan. Prof Madya Dr. Mohd Rusdan (2013) di dalam satu kertas kerja beliau menyatakan bahawa tidak dapat disangkal lagi pusat-pusat pemulihan dadah yang mengambil pendekatan terapi psikospiritual Islam ini telah berjaya memulihkan sama ada secara sepenuhnya atau sebahagian.

Oleh kerana peranan agama dalam menangani isu ini mula menunjukkan kesan positif, penulisan ini akan mengupas isu penyalahgunaan dadah menurut prespektif hadis, iaitu sumber kedua agama Islam selepas al-Quran. Hal ini bertepatan dengan kedudukan hadis Nabi SAW dan sunnah baginda sebagai sumber dan punca kekuatan umat Islam. Islam sebagai agama yang meliputi seluruh ruang lingkup kehidupan penganutnya telah menetapkan peraturan, tatacara dan piawaian dalam kehidupan seharian. Setiap perlakuan mempunyai kedudukannya di sisi syarak berasaskan konsep hikmah serta *targhib* dan *tarhib*. Penulisan ini diharapkan dapat memberi pemahaman isu dadah berdasarkan prespektif hadis serta penjelasan bagaimana hadis berinteraksi dengan isu ini berdasarkan pendekatan Nabi SAW.

2. Definisi Dadah

Ketiadaan istilah dadah yang seragam dan jelas dalam Bahasa Malaysia telah menimbulkan ketidakfahaman dan kekeliruan di kalangan masyarakat mengenai makna dan penggunaan istilah 'dadah' dengan betul.

Istilah '*drug*' dalam Bahasa Inggeris mempunyai takrif yang neutral, luas dan umum. Penggunaan istilah '*drug*' ini perlu digunakan bersama '*use*', '*misuse*' atau '*abuse*' untuk menggambarkan keadaan penggunaan yang berbeza-beza. Ini berbeza dengan istilah 'dadah' dalam Bahasa Malaysia yang mempunyai takrif yang lebih khusus iaitu menggambarkan sesuatu yang jijik dan mesti dijauhi. Ia tidak digunakan bersama perkataan 'penyalahgunaan' yang lazim digunakan. Perkataan 'penyalahgunaan' adalah bermaksud berlebihan jika digandingkan bersama perkataan dadah (Abdul Ghafar, 2005).

Dadah merupakan suatu istilah khas kepada sejenis bahan yang mendatangkan kemudaratan kepada kesihatan seseorang dari segi jasmani (fizikal), rohani (mental dan emosi) serta tingkahlaku pengguna apabila digunakan. Dadah dimasukkan ke dalam tubuh badan secara disuntik, dihidu, dihisap atau dimakan serta boleh mengubah fungsi tubuh badan seseorang atau organisma dari segi fizikal atau mental (Ruslan, 2009). Akibat daripada kesan ini, seseorang yang menggunakan dadah akan terus bergantung hidup kepada dadah tersebut dan mengakibatkan ketagihan. Seseorang penagih sanggup menggadai maruah serta memperhambakan diri kepada sesiapa sahaja asalkan bekalan dadahnya terjamin. Kesannya, ramai yang sanggup mengemis dan menggadaikan diri.

Menurut Kamus Dewan Edisi Keempat (2008), dadah ialah bahan yang digunakan untuk ubat-ubatan atau bahan (biasanya yang mengetagihkan) yang digunakan sebagai ubat tidur dan dapat menyebabkan khayal atau tidak sedarkan diri serta membahayakan diri.

Secara umum, dadah merupakan bahan kimia psikoaktif yang mempunyai kesan paling ketara ke atas sistem saraf pusat iaitu otak dan saraf tunjang, digunakan bukan untuk tujuan perubatan dan penggunaannya adalah dilarang, diperolehi secara haram, membawa kepada penggantung fizikal dan psikologikal serta mendatangkan kesan buruk ke atas kesihatan diri dan fungsi sosial (Mahmood Nazar, 2006).

Walaupun dadah yang dikenali umum terdiri daripada heroin, morfin dan ganja, pada hakikatnya ia merangkumi juga semua bahan yang boleh memberi kesan seperti yang dinyatakan (Abdul Ghafar, 2005). Oleh itu, sesetengah ubat-ubatan jika tidak digunakan mengikut peraturan dan sukatan yang betul boleh memberi kesan negatif yang sama seperti dadah. Dadah mempunyai kesan paling ketara ke atas sistem saraf pusat individu, memberi kesan pada fizikal, emosi dan mental serta sosial.

3. Kedudukan Dadah Menurut Prespektif Hadis

Peranan hadis dalam melengkapi al-Quran sudah diketahui umum, iaitu tidak mungkin al-Quran dapat difahami tanpa melihat kepada hadis. Tidak terdapat hukum atau larangan khusus daripada al-Quran atau hadis Rasulullah SAW terhadap penggunaan dadah. Hal ini kerana dadah belum lagi wujud pada zaman tersebut. Dadah mula dikenalkan kepada dunia oleh kerajaan Tatar (Hasanin Makhluaf, 1951). Di dalam penetapan hukum yang tidak dinyatakan secara jelas di dalam al-Quran dan Hadis, ulama telah menetapkan Ijmak dan Qias merupakan sumber yang ketiga dan keempat bagi menentukan sesuatu hukum.

Secara umum, Islam melarang setiap muslim mendekati perbuatan-perbuatan yang keji dan merosakkan diri. Islam sentiasa memuliakan umatnya dan menganjurkan kehidupan yang sejahtera, maka larangan-larangan yang keras telah dimeterikan supaya setiap individu tidak terjebak dalam kebinasaan (al-Qaradhawi, 1997). Dadah di dalam Islam menyamai istilah *khamr* yang digunakan untuk semua bahan yang memabukkan, mengkhayalkan, menjadi punca penagihan, pergantungan, perubahan tingkah laku dan sebagainya. Perubahan ini berhubung rapat dengan fungsi akal yang tidak dapat berjalan secara sempurna. Perkataan *khamr* berasal daripada perkataan *yakhmur*, maksudnya menutup, menyembunyi atau melindungi. Oleh itu *khamr* merujuk secara meluas kepada fungsi kehidupan atau biologi sesuatu bahan yang boleh menutup, menyembunyi atau menghilangkan fungsi yang biasa dialami oleh seseorang yang normal. Dalam hal ini dikaitkan khusus dengan keadaan fikiran dan akal (Zulkifli Abdul Razak, 1998).

Dari ‘Abd Allah Ibn Umar, Nabi Muhammad SAW bersabda:

كُلُّ مُسْكِرٍ خَمْرٌ. وَكُلُّ مُسْكِرٍ حَرَامٌ

Maksudnya: “Setiap yang memabukkan itu *khamr* dan setiap yang memabukkan itu haram” (HR Muslim, *Kitab al-Asyribah, Bab Bayan Anna Kulii Muskir Khamr*, no. 2003)

Al-Hafiz Ibn Hajar (2014) dalam mensyarahkan hadis ini menyatakan perkataan: “setiap yang memabukkan itu haram” bermaksud pengharaman setiap yang memabukkan walaupun bukan dengan cara minuman. Oleh itu, termasuk di dalam kategori ini pengambilan ganja dan sebagainya dalam apa cara sekalipun. Perbuatan ini termasuk dalam dosa besar kerana menyamai arak pada berkhayal serta mempunyai kesan ketagihan.

Ibn Taimiyah (2005) pula menyatakan jumbuh ulama berpandangan dadah ialah najis yang haram, tidak ada beza pada kandungannya yang sedikit mahupun banyak, sama ada menghilangkan fungsi akal ataupun tidak. Setiap yang berpotensi menghilangkan fungsi akal adalah haram biarpun ia tidak menyebabkan berkahyal dan halusinasi. Hal ini bertepatan hukumnya seperti arak yang tetap haram diminum walaupun dengan minuman itu peminum tidak mabuk.

Islam menyedari pentingnya akal fikiran bagi diri seseorang dalam menjalankan aktiviti individu mahupun sosial. Imam Al-Ghazali di dalam kitabnya *Ihya' Ulum al-Din* (2005) menyebut; “Ketahuilah bahawa badan manusia itu seperti sebuah kota. Akal manusia itu adalah sebagai raja yang menguruskan hal-ehwal kota itu. Pancaindera zahir dan batin umpama tentera-tentera dan pegawai-pegawainya. Seluruh anggota badannya itu seperti rakyatnya. Nafsu serta syahwatnya dan kemarahannya adalah sebagai musuh yang bertarung untuk menguasai kerajaannya itu dan untuk merosakkan rakyatnya.”

Melalui akal fikiran seseorang menentukan haluan dan pertimbangan. Oleh itu, akal fikiran dalam erti kata sepenuhnya dapat membimbing seseorang ke arah jalan yang betul. Oleh itu, manusia dikatakan terbentuk menjadi ‘imej yang paling mulia’ sepertimana firman Allah dalam surah at-Tin ayat ke-4:

لَقَدْ خَلَقْنَا الْإِنْسَانَ فِي أَحْسَنِ تَقْوِيمٍ (٤)

Maksudnya: “Sesungguhnya kami telah menciptakan manusia dalam bentuk yang sebaik-baiknya” (Surah at-Tin, 4)

Islam merupakan agama yang mementingkan kesejahteraan dalam segenap aspek. Sabda Rasulullah SAW yang diriwayatkan oleh Abu Said al-Khudri:

لَا ضَرَرَ وَلَا ضِرَارَ

Maksudnya: “Tidak memudaratkan dan tidak didatangkan mudarat” (HR Ahmad, *Musnad Bani Hashim*, No. 2865).

Hadis ini jelas menyatakan panduan penting buat umat Islam iaitu kepentingan menghilangkan mudarat. Mudarat yang dibawa oleh dadah sangat besar, memudaratkan penggunaanya dan orang lain. Dadah memberi impak buruk kepada individu, keluarga, masyarakat dan negara.

Ini juga sepertimana yang dinaskan oleh al-Imam al-Ghazali (1993) di dalam kitabnya *al-Mustasfa* yang menyatakan bahawa setiap benda yang memabukkan dari yang diminum dan dimakan daripadanya adalah haram, diqiyaskan hukumnya ke atas arak. Ini kerana pengharamannya adalah untuk menjaga akal (*hifz al-'aql*) yang merupakan tempat pertimbangan. Pengharaman syarak ke atas arak menunjukkan perhatian yang diberikan kepada *maslahah* (kebaikan).

Fatwa yang dikeluarkan oleh Bekas Mufti Mesir, al-Syeikh Hasanin Makhluif (1951) menyatakan bahawa dadah adalah haram hukumnya dari segi penggunaan, pemberian dan membuat jualan perniagaan. Manakala, Majlis Raja-Raja dalam mesyuarat yang ke-128 yang diadakan pada 24 Februari 1983 setelah menimbang pendapat Jawatankuasa Fatwa Majlis Kebangsaan bagi Ehwat Agama Islam (2015) telah membuat keputusan:

“Sebarang penyalahgunaan, termasuk penyalahgunaan dadah, hukumnya di sisi syarak adalah haram dan dengan itu adalah ditegah sama sekali dan dadah hanya boleh digunakan untuk tujuan perubatan yang sah mengikut syarak”

Oleh itu, berdasarkan dalil-dalil dan pandangan para sarjana Islam berkenaan hal ini, jelaslah kepada kita bahawa kedudukan dadah di sisi Islam adalah haram dan lebih berat berbanding arak.

4. Interaksi Hadis Terhadap Penagih Dadah

Islam sentiasa membuka seluas-luasnya pintu penerimaan terhadap mereka yang terlanjur agar kembali ke jalan yang lurus. Nabi SAW selaku penyampai wahyu, sentiasa memberi kepercayaan dan harapan agar golongan ini bangkit dari kejatuhan kepada keampunan dan kasih sayang Allah SWT. Sabda Nabi SAW:

كُلُّ ابْنِ آدَمَ خَطَّاءٌ ، وَخَيْرُ الْخَطَّائِينَ التَّوَّابُونَ

Maksudnya: “Kesemua anak Adam melakukan kesalahan. Sebaik-baik yang melakukan kesalahan adalah mereka yang bertaubat” (HR al-Tirmidhi, *Kitab Sifat al-Qiyamah wal Raqaiq, bab Minh* No. 2499).

Andai seseorang itu sudah bertaubat dengan memohon keampunan kepada Allah dengan sebenar-benarnya, menyesal, berazam tidak akan mengulangi dan memohon maaf jika kesalahan melibatkan pihak yang lain, maka pengampunannya terletak di sisi Allah SWT yang Maha Pengampun. Tidak wajar seseorang menyakitinya dengan memulau, menyindir dan mengungkit dosa silamnya. Hal ini akan menyebabkan proses taubat dan pemulihan seseorang tidak berjaya. Sebaliknya, Islam mengajar umatnya agar saling tolong menolong ke arah kebaikan. Firman Allah SWT:

وَتَعَاوَنُوا عَلَى الْبِرِّ وَالتَّقْوَىٰ

Maksudnya: “Dan bekerjasamalah pada perkara kebaikan dan taqwa” (Surah al-Maidah, 2).

Sesungguhnya memberi sokongan dengan menerima golongan sebegini agar mereka pulih adalah sebahagian daripada perkara kebaikan dan taqwa.

Menurut kajian (Mahmood, 1996) antara punca penagih dadah berulang adalah kerana masyarakat tidak menerima mereka. Hal ini bercanggah dengan prinsip yang dibawa oleh Nabi SAW dalam menyantuni golongan sebegini. Mereka yang melakukan kesalahan tidak boleh dicerca dan dihina. Islam melarang perbuatan ini. Direkodkan oleh imam al-Bukhari daripada Abu Hurairah:

أَتَى النَّبِيَّ صَلَّى اللَّهُ عَلَيْهِ وَسَلَّمَ بَرَجُلٌ قَدْ شَرِبَ، قَالَ: «اضْرِبُوهُ» قَالَ أَبُو هُرَيْرَةَ: فَمِنَّا الضَّارِبُ بِيَدِهِ، وَالضَّارِبُ بِنَعْلِهِ، وَالضَّارِبُ بِثَوْبِهِ، فَلَمَّا انصَرَفَ، قَالَ بَعْضُ الْقَوْمِ: أَخْزَاكَ اللَّهُ، قَالَ: «لَا تَقُولُوا هَكَذَا، لَا تُعِينُوا عَلَيْهِ الشَّيْطَانَ

Maksudnya: “Pada suatu hari telah datang kepada nabi lelaki yang mengaku telah meminum arak. Lalu Nabi SAW bersabda: Pukullah dia. Maka dijalankan hukuman yang ditetapkan. Sesudah selesai hukuman datanglah beberapa kaum lantas berkata: “Engkau telah dimalukan Allah” Nabi lantas bersabda: “Jangan berkata begitu. Janganlah menolong syaitan dalam hal ini” (HR Bukhari, *Kitab al-Hudud, bab al-Darb bi al-Jarid wa al-Nia’l*, no. 6777).

Dalam riwayat yang lain nabi bersabda:

وَلَكِنْ قُولُوا: اللَّهُمَّ اغْفِرْ لَهُ، اللَّهُمَّ اِرْحَمْهُ

Maksudnya: “Jangan berkata begitu. Tetapi katakanlah Allah ampunkanlah dia, Allah rahmati dia” (HR Abu Daud, *Kitab al-Hudud, Bab al-Had fi al-Khamr*, no. 4478). Riwayat ini jelas menerangkan bagaimana Nabi mengajar umatnya berinteraksi dengan pesalah. Islam memandang

pesalah dengan pandangan rahmat dan harapan hatta di dalam riwayat ini dianjurkan pula mendoakan kebaikan kepada mereka. Hukuman yang dijalankan pula adalah sebagai peringatan kepada masyarakat dan memulihkan pesalah.

Diriwayatkan oleh Abu Hurairah sesungguhnya Nabi SAW telah bersabda:

وَالَّذِي نَفْسِي بِيَدِهِ لَوْ لَمْ تُذُنُّوا لَذَهَبَ اللَّهُ بِكُمْ، وَلَجَاءَ بِقَوْمٍ يُذُنُّونَ، فَيَسْتَغْفِرُونَ اللَّهَ فَيَغْفِرُ لَهُمْ

Maksudnya: “Demi Allah yang diriku dalam gengaman-Nya, jika kamu tidak berdosa nescaya akan didatangkan dengan kaum yang melakukan dosa. Supaya mereka meminta ampun kepada Allah lalu Allah memberikan keampunan kepada mereka” (HR Muslim, *Kitab al-Riqaq, Bab Suqut al-Zunub* No. 2749).

Hadis ini menjelaskan perbuatan dosa dan kesilapan adalah tanda keampunan dan rahmat Allah jika sesudah itu seseorang itu menyesal dan memohon kemaafan daripada Allah. Hal ini kerana perbuatan dosa mengesahkan sifat Allah selaku yang Maha Pengampun. Kesilapan dan dosa bukanlah faktor yang menyebabkan seseorang harus dipulaukan masyarakat dan jauh dari rahmat Allah. Sungguhpun begitu, perbuatan dosa tidak boleh dipandang rendah dan dianggap remeh sebagaimana telah terdapat ancaman yang pedih kepada mereka yang mengambil mudah dalam melakukan dosa. Hadis ini ingin menekankan sifat keampunan Allah serta galakan Islam kepada pendosa agar jangan berputus asa daripada rahmat Allah. Firman Allah SWT:

قُلْ يَاعِبَادِيَ الَّذِينَ أَسْرَفُوا عَلَىٰ أَنفُسِهِمْ لَا تَقْنَطُوا مِن رَّحْمَةِ اللَّهِ

Maksudnya: “Katakanlah: Wahai hambaku yang melampaui batas, janganlah kamu berputus asa dari rahmat Allah” (Surah az-Zumar, 53)

Penagihan dadah menyebabkan hilang kewarasan dan pertimbangan serta pergantungan sepenuhnya kepada dadah untuk terus hidup. Kesan penagihan ini semestinya mengakibatkan kesan negatif kepada orang disekeliling mereka. Namun sebagai umat Nabi Muhammad SAW sayugia kita menghayati teladan daripada baginda yang diriwayatkan oleh ‘Abd Allah Ibn Abbas bahawa Rasulullah SAW telah bersabda ketika pembukaan kota Mekah:

. مَنْ دَخَلَ دَارَ أَبِي سَفْيَانَ فَهُوَ آمِنٌ، وَمَنْ دَخَلَ الْمَسْجِدَ فَهُوَ آمِنٌ، وَمَنْ أَغْلَقَ بَابَهُ فَهُوَ آمِنٌ

Maksudnya: “Sesiapa yang memasuki rumah Abu Sufyan maka dia akan selamat, sesiapa yang menutup pintu maka dia akan selamat, sesiapa yang memasuki masjid maka dia akan selamat” (HR Abu Daud, *Kitab al-Kharraj wal Ijarah, Bab Ma Jaa fi Khabr Makkah*, No. 3022)

Berdasarkan hadis ini terpampang teladan melalui kepimpinan yang ditonjolkan melalui arahan Nabi SAW. Abu Sufyan merupakan ketua kabilah musyrikin Quraisy ketika itu dan telah memimpin pelbagai siri peperangan menentang orang Islam. Mereka telah mengekang dakwah dan mengakibatkan kerugian harta dan nyawa kepada dunia Islam. Namun, saat Abu Sufyan menyerah diri dan mengisytiharkan keislamannya, Nabi SAW telah memberikannya kemaafan dan mengangkat martabat beliau. Penerimaan sebegini tidak hanya berlaku terhadap Abu Sufyan bahkan turut berlaku ketika penerimaan Umar al-Khattab dan Ikrimah Ibn Abu Jahal. Peristiwa ini mengajar umat Islam supaya bersifat pemaaf dan memandang hadapan dalam membina masyarakat.

Berdasarkan hadis beserta keterangan yang dibawa jelas menerangkan bagaimana interaksi Nabi SAW terhadap pesalah. Pesalah perlulah dilihat dengan pandangan harapan dan pemulihan. Perkara ini merupakan tuntutan agama selain membantu pesalah untuk bangkit dari bayangan

kesalahan lampau dan menjadi lebih baik. Minda positif ini lah yang ingin diterapkan oleh Nabi SAW kepada pesalah ini. Tidak dinafikan penagih dadah mempunyai imej yang jelik di sisi masyarakat dan memberikan impak yang buruk terhadap sekelilingnya. Namun, jika sokongan sosial tidak diberikan sewaktu sebelum, semasa dan selepas proses pemulihan, usaha ini akan sia-sia. Kesannya, setiap lapisan masyarakat akan menanggung akibat daripada kegagalan pemulihan penagih dadah dengan pertambahan bilangan penagih serta krisis sosial yang merebak.

5. *Tarhib* dan *Tarhib* Dalam Isu Penagihan Dadah

Keseimbangan adalah sendi agama Islam. Nabi SAW mengutamakan bersederhana dalam berdakwah, gaya kehidupan mahupun dalam penetapan sesuatu hukum. Abdullah ibn Abbas meriwayatkan bahawa Rasulullah SAW bersabda:

أَيُّهَا النَّاسُ إِنِّي آتِيكُمْ وَالْغُلُوَّ فِي الدِّينِ، فَإِنَّهُ أَهْلَكَ مَنْ كَانَ قَبْلَكُمْ

Maksudnya: “Wahai manusia, berjaga-jagalah kamu akan melampau dalam agama. Sesungguhnya ia telah membinasakan kaum sebelum kamu” (HR Ibn Majah, *Kitab al-manasik, bab ma Qadr Hisr Ruma*, hadis no. 3029)

Konsep *tarhib* dan *tarhib* dalam berdakwah telah diterapkan dalam dakwah Nabi Muhammad SAW seterusnya diamalkan oleh sahabat baginda dan generasi selepas itu. Pendekatan ini dapat dilihat melalui al-Quran dan hadis. *Tarhib* bermaksud galakan supaya melakukan suruhan Allah SWT dengan balasan ganjaran atau kelebihan yang menggembirakan sama ada di dunia mahupun di akhirat. *Tarhib* pula bermaksud ancaman yang menggerunkan berupa kerugian atau azab di dunia dan akhirat (Sulaiman ‘Abd al-Aziz, 1416H). Konsep *tarhib* dan *tarhib* saling melengkapi, tidak boleh memilih suatu pendekatan melebihi yang lain. Akibatnya, mereka yang menerima dakwah tidak akan terbentuk mengikut acuan yang seimbang.

Menangani penagihan dadah melalui pendekatan agama telah terbukti berkesan (Mohd Rusdan, 2013). Islam sebagai agama yang lengkap mempunyai peranan yang besar dalam hal ini. Penagih dadah merupakan golongan yang wajib didekati. Mereka memerlukan bimbingan, motivasi dan kaunseling dalam proses untuk pulih daripada ketagihan.

Konsep *tarhib* dan *tarhib* dapat memberikan pandangan yang luas terhadap sesuatu permasalahan (Sulaiman ‘Abd al-Aziz, 1416H). Hal ini kerana *tarhib* dan *tarhib* diaplikasikan oleh Nabi SAW dan meliputi seluruh aspek dakwah Nabi SAW. Oleh itu, penulisan ini akan mengupas isu penagihan dadah menurut kaca mata hadis berdasarkan konsep *tarhib* dan *tarhib*.

Telah diriwayatkan pelbagai hadis tentang galakan Nabi SAW kepada mereka yang terlanjur melakukan dosa supaya meninggalkan dosa, bertaubat dan kembali ke pangkal jalan. Diriwayatkan oleh Abu Musa al-Asy’ari bahawa Rasulullah SAW bersabda:

إِنَّ اللَّهَ عَزَّ وَجَلَّ يَسْطُرُ يَدَهُ بِاللَّيْلِ لِيُتُوبَ مُسِيءُ النَّهَارِ، وَيَسْطُرُ يَدَهُ بِالنَّهَارِ لِيُتُوبَ مُسِيءُ اللَّيْلِ

Maksudnya: “Sesungguhnya Allah melapangkan tangannya pada waktu malam, mengampunkan dosa di sebelah pagi dan melapangkan tangannya di sebelah pagi, mengampunkan dosa di sebelah malam” (HR Muslim, *Kitab al-Taubah, bab Qubul al-Taubah Min Zunub*, No. 2759).

Riwayat ini menerangkan keluasan rahmat Allah kepada hamba-Nya dalam menerima taubat mereka. Pesalah di dalam Islam sentiasa diberi peluang dan dipandang secara positif.

Selain itu, diriwayatkan oleh Anas sesungguhnya Rasulullah SAW bersabda:

كُلُّ ابْنِ آدَمَ خَطَّاءٌ ، وَخَيْرُ الْخَطَّائِينَ التَّوَّابُونَ

Maksudnya: “Kesemua anak Adam melakukan kesalahan. Sebaik-baik yang melakukan kesalahan adalah mereka yang bertaubat” (HR al-Tirmidhi, *Kitab Sifat al-Qiyamah wal Raqaiq, bab Minh* No. 2499).

Hadis ini menerangkan adalah perkara normal jika seseorang melakukan kesalahan dan dosa. Namun perbuatan itu haruslah diiringi dengan taubat kerana mereka yang bertaubat adalah sebaik-baik manusia.

Keampunan Allah tidak terhingga dan merupakan manifestasi sifatnya sebagai Maha Pengampun dan Maha Penyayang. Sabda Nabi SAW yang diriwayatkan oleh Abu Hurairah:

يَا ابْنَ آدَمَ لَوْ بَلَغَتْ ذُنُوبُكَ عَنَانَ السَّمَاءِ ثُمَّ اسْتَغْفَرْتَنِي غَفَرْتُ لَكَ

Maksudnya: “Jika kalian melakukan dosa hatta setinggi langit pun. Kemudian kamu bertaubat, nescaya Allah akan mengampuni kalian” (HR al-Tirmidhi, *Kitab al-Dakwaat, Bab fi Fadhl al-Taubah wal Istighfar*. No. 3540)

Akhir sekali, apabila seseorang memohon keampunan daripada Allah berkali-kali disebabkan dosanya dia akan berasa kecewa dan malu akan pengulangan dosanya. Namun ajaran Islam sentiasa memberi harapan dan galakan supaya umatnya tidak berputus asa dalam mengecapi kebaikan. Daripada Rasulullah SAW:

إِنَّ عَبْدًا أَصَابَ ذَنْبًا - وَرُبَّمَا قَالَ أَذْنَبَ ذَنْبًا - فَقَالَ: رَبِّ أَذْنَبْتُ - وَرُبَّمَا قَالَ: أَصَبْتُ - فَأَغْفِرْ لِي، فَقَالَ رَبُّهُ: أَعْلِمَ عَبْدِي أَنَّ لَهُ رَبًّا يَغْفِرُ الذَّنْبَ وَيَأْخُذُ بِهِ؟ غَفَرْتُ لِعَبْدِي، ثُمَّ مَكَثَ مَا شَاءَ اللَّهُ ثُمَّ أَصَابَ ذَنْبًا، أَوْ أَذْنَبَ ذَنْبًا، فَقَالَ: رَبِّ أَذْنَبْتُ - أَوْ أَصَبْتُ - آخَرَ، فَأَغْفِرْهُ؟ فَقَالَ: أَعْلِمَ عَبْدِي أَنَّ لَهُ رَبًّا يَغْفِرُ الذَّنْبَ وَيَأْخُذُ بِهِ؟ غَفَرْتُ لِعَبْدِي، ثُمَّ مَكَثَ مَا شَاءَ اللَّهُ، ثُمَّ أَذْنَبَ ذَنْبًا، وَرُبَّمَا قَالَ: أَصَابَ ذَنْبًا، قَالَ: قَالَ: رَبِّ أَصَبْتُ - أَوْ قَالَ أَذْنَبْتُ - آخَرَ، فَأَغْفِرْهُ لِي، فَقَالَ: أَعْلِمَ عَبْدِي أَنَّ لَهُ رَبًّا يَغْفِرُ الذَّنْبَ وَيَأْخُذُ بِهِ؟ غَفَرْتُ لِعَبْدِي ثَلَاثًا، فَلْيَعْمَلْ مَا شَاءَ

Maksudnya “Sesungguhnya ada seorang hamba yang terjerumus ke dalam dosa, lalu ia berkata, “Wahai tuhanku, aku telah melakukan dosa, ampunilah aku.” Allah menjawab, “Apakah hamba-Ku mengetahui bahawa ia memiliki tuhan Yang Maha Mengampuni dosa dan akan menyeksa hamba-Nya? Ketahuilah, Aku telah mengampuninya.” Kemudian ia berhenti sesuai yang Allah kehendaki. Lalu ia terjerumus lagi ke dalam dosa. Lalu ia berkata, “Wahai tuhanku, aku telah terjerumus ke dalam dosa yang lain, ampunilah aku.” Allah menjawab, “Apakah hamba-Ku mengetahui bahawa ia memiliki tuhan Yang Maha Mengampuni dosa dan akan menyeksa hamba-Nya? Ketahuilah, Aku telah mengampuninya.” Kemudian ia berhenti sesuai yang Allah kehendaki. Lalu ia terjerumus lagi ke dalam dosa. Lalu ia berkata, “Wahai tuhanku, aku telah terjerumus dalam dosa yang lain, ampunilah aku.” Allah menjawab, “Apakah hamba-Ku mengetahui bahawa ia memiliki tuhan Yang Maha Mengampuni dosa dan akan menyeksa hamba-Nya? Ketahuilah, Aku telah mengampuninya.” Ini disebut tiga kali. Allah menambahkan, “Lakukanlah semahu dia.” (HR. Bukhari, *Kitab al-Tauhid, Bab Qaulihi Taala: Yuriduna an Yabdilu Kalam Allah*, no. 7507).

Lafaz “Lakukanlah semahu dia” bermaksud Allah dengan sifat Maha Pengampun akan mengampunkan dosa hamba itu jika dia memohon keampunan dengan sebenarnya biarpun kesalahan itu telah acap kali berulang.

Telah diriwayatkan juga pelbagai hadis tentang *tarhib* atau ancaman Nabi SAW kepada mereka yang terlanjur melakukan dosa supaya seseorang itu mencegah, menjauhi dan tidak mengulangi kesalahan tersebut. Diriwayatkan oleh Abu Hurairah bahawa Nabi SAW bersabda:

إن العبد إذا أخطأ خطيئته نُكِّتَتْ في قلبه نُكْتَةٌ سوداءٌ فإذا هو نَزَعَ واستغفَرَ وتَابَ سَقَلَ قلبه وإن عاد زيدَ فيها حتى تَعْلُو قلبه

Maksudnya: “Seseorang hamba itu jika dia melakukan dosa akan dititikkan titik hitam pada hatinya. Jika di meninggalkan dosa tersebut dan bertaubat maka dihilangkan titik tersebut. Jika dia mengulangi bertambah titik itu sehingga menutupi hatinya” (HR Tirmidhi, *Kitab Tafsir al-Quran, Bab Min Surah Wail Lil Mutaffifin*, No. 3334)

Hadis ini menerangkan maksiat yang berulang akan menyebabkan hati menjadi hitam dengan titik tersebut. Hati yang hitam pula akan kalis cahaya iman dan hidayah sedangkan hati adalah raja segala anggota. Jika buruk, maka buruklah seluruh jasad. Oleh itu, dengan maksiat yang berulang dan seseorang individu yang tidak bertaubat akan menyebabkan dia semakin jauh dari rahmat dan petunjuk Allah SWT.

Di hari akhirat kelak setiap manusia akan diberi balasan mengikut amalannya di dunia. Syurga merupakan balasan buat orang yang mentaati Allah manakala neraka merupakan tempat pembalasan kepada mereka yang ingkar perintah Allah SWT. Hal ini sepertimana yang terkandung dalam sabda Nabi SAW:

كُلُّ أُمَّتِي يَدْخُلُونَ الْجَنَّةَ إِلَّا مَنْ أَبِي، قَالُوا: يَا رَسُولَ اللَّهِ، وَمَنْ يَا أَبِي؟ قَالَ: «مَنْ أَطَاعَنِي دَخَلَ الْجَنَّةَ وَمَنْ عَصَانِي فَقَدْ أَبِي

Maksudnya: “Semua umat aku akan masuk syurga kecuali mereka yang enggan”. Sahabat bertanya: Siapakah yang enggan ya Rasulullah?” Baginda menjawab: “sesiapa yang mentaati aku maka mereka masuk ke syurga, sesiapa yang mengingkariku maka mereka lah yang enggan” (HR al-Bukhari, *Kitab al-I'tisom bi al-Kitab wal al-Sunnah, Bab al-Iqtida' bil Sunnah*. No. 7280).

Neraka merupakan tempat seksaan di akhirat kelak. Azab neraka telah digambarkan sebagai azab yang pedih dan tidak terperi. Hal ini menyebabkan Rasulullah SAW sentiasa memberi amaran kepada umatnya akan seksa tersebut. Sabda Rasulullah dalam sebuah khutbah:

أَنْذَرْتُكُمْ النَّارَ، أَنْذَرْتُكُمْ النَّارَ، أَنْذَرْتُكُمْ النَّارَ. فَمَا زَالَ يَقُولُهَا

Maksudnya: “aku memberi amaran kepada kalian akan neraka, aku memberi amaran kepada kalian akan neraka, aku memberi amaran kepada kalian akan neraka. Baginda terus menerus mengulangi ungkapan demikian.” (HR al-Darimi, *kitab al-Raqaiq, Bab Fi Tahzir al-Nar*, No. 2854)

Seterusnya, hadis yang diriwayatkan oleh Anas bahawa Rasulullah SAW bersabda ketika menafsirkan surah al-Tahrim ayat 7:

أَوْقَدَ عَلَى النَّارِ أَلْفَ سَنَةٍ حَتَّى احْمَرَّتْ، ثُمَّ أَوْقَدَ عَلَيْهَا أَلْفَ سَنَةٍ حَتَّى ابْيَضَّتْ، ثُمَّ أَوْقَدَ عَلَيْهَا أَلْفَ سَنَةٍ حَتَّى اسْوَدَّتْ فَهِيَ
“سَوْدَاءٌ مُظْلِمَةٌ”

Maksudnya: “Ketika Allah SWT menciptakan jahanam, apinya dinyalakan seribu tahun sehingga memerah, kemudian dinyalakan lagi sehingga seribu tahun sampai kelihatan putih, lalu dinyalakan lagi seribu tahun sehingga kelihatan hitam yang likat” (HR al-Tirmidhi, *Kitab Sifat Jahannam, bab Ma Jaa' Anna Narukum Hadha* No. 2591).

Neraka disebut dalam al-Quran dan hadis dengan kata ‘Nar’ kerana di dalamnya terdapat seksaan api yang sangat menggerunkan. Hadis ini memberi gambaran betapa panasnya api neraka kerana telah dinyalakan setelah begitu lama lalu berubah warna.

Hal ini dikuatkan lagi dengan hadis yang diriwayatkan oleh Abu Hurairah, daripada Nabi SAW:

نَارُكُمْ هَذِهِ الَّتِي يُوقَدُ بُنُو آدَمَ جُزْءٌ وَاحِدٌ مِنْ سَبْعِينَ جُزْءًا مِنْ حَرِّ جَهَنَّمَ، قَالُوا: وَاللَّهِ إِنْ كَانَتْ لِكَافِيَةِ يَا رَسُولَ اللَّهِ، قَالَ: فَإِنَّهَا فَضَّلَتْ بِنِسْعَةٍ وَسِتِّينَ جُزْءًا كَلْهُنَّ مِثْلُ حَرِّهَا“

Api di dunia ini satu bahagian daripada tujuh puluh bahagian daripada api neraka. Para sahabat lalu berkata: “Sesungguhnya ia telah mencukupi!” Baginda bersabda lagi: “Sesungguhnya ia lebih panas dengan enam puluh sembilan bahagian, setiap daripadanya dengan kepanasannya ” (HR Tirmizi, *Kitab Sifat Jahannam, bab Ma Jaa’ Anna Narukum Hadha*, No. 2589).

Kaedah *targhib* dan *tarhib* telah diimplimenkan pada dakwah Nabi SAW dalam memimpin umatnya. Berdasarkan konsep ini, pandangan hadis terhadap pelaku dosa seperti penagih dadah dapat difahami dengan baik. Islam memberi ancaman atau *tarhib* terhadap individu yang ingin mencuba melakukan dosa ataupun ingin mengulangi perbuatan dosa. Islam juga memberi galakan atau *targhib* kepada mereka yang telah melakukan dosa supaya kembali ke pangkal jalan. Kedua pendekatan ini saling melengkapi dan bertujuan membimbing dan memberikan kebahagiaan di dunia dan akhirat kepada pelaku tersebut.

6. Penutup

Penagih dadah merupakan golongan yang wajib didekati. Mereka memerlukan bimbingan, motivasi dan kaunseling dalam proses untuk pulih daripada ketagihan. Penerimaan dan persepi masyarakat yang negatif menyebabkan proses ini gagal. Akibatnya, gejala relapis dan pertambahan penagih dadah tidak dapat dibendung.

Islam sebagai agama yang lengkap dan rahmat kepada segenap alam telah menyediakan panduan berkenaan hal ini. Penagih dadah tidak wajar disisih atau dilihat dengan pandangan yang jelik bahkan harus diberi peluang dan harapan untuk sembuh sepertimana yang ditekankan oleh baginda Nabi SAW.

Semoga dengan bimbingan hadis dalam perkara ini akan memahamkan masyarakat akan pandangan Islam yang sebenar terhadap penagih dadah serta bagaimana pendekatan yang paling sesuai dan berhikmah.

Rujukan

- AADK. 2016. *Laporan Agensi Anti Dadah Kebangsaan 2016*. Malaysia: Agensi AntiDadah Kebangsaan.
- Abdul Ghafar Taib. 2005. *Bersama Perangi Dadah*. Kuala Lumpur: Penerbitan Sri Kenanga.
- Al-Ghazali. 1993. *Al-Mustasfa*. Beirut: Dar Kutub al-Ilmiyyah.
- Al-Ghazali, 2005. *Ihya’ Ulum al-Din*. Beirut: Dar Ibn Hazm.
- Al-Haithami. 1994. *Majma’ Zawaid wa Manba’ Fawaid*. Kaherah: Maktabah al-Qudsi.
- Al-Munziri. 2003. *Al-Targhib wa al-Tarhib*. Beirut: Dar al-Kitab al-Ilmiyah.
- Dzulkifli Abdul Razak. 1998. *Dadah: Pandangan Islam*. Pulau Pinang: Pusat Racun Negara.
- Hasanin Makhluaf. 1951. *Fatawa Syari’yyah wa Buhuth Islamiyyah*. Kaherah: Dar al-Kutub al-Arabi.
- Ibn Hajar al-Asqalani. 2014. *Bulughul Maram Min Adilati wal Ahkam*. Riyadh: Dar al-Qabs.
- Ibn Taimiyyah. 2005. *Majmu’ al-Fatawa*. Iskandariah: Dar al-Wafa’.
- Kamus Dewan Edisi Keempat*. 2005. Kuala Lumpur: Dewan Bahasa Pustaka.
- Kompilasi Pandangan Hukum Muzakarah Jawatankuasa Fatwa Majlis Kebangsaan Bagi Hal Ehwat Ugama Islam Malaysia*. 2015. Cet: Kelima. Selangor: JAKIM.

- Mahmood Nazar. 2006. *Mencegah, Merawat & Memulihkan Penagihan Dadah: Beberapa Pendekatan dan Amalan di Malaysia*. Kuala Lumpur: Utusan Publication.
- Mahmood Nazar. 2009. *Penyalahgunaan Dadah Aspek Undang-undang, Pemulihan, Rawatan & Pencegahan*. Selangor: Edusystem Sdn.Bhd.
- Mahmood, Shuib, C.D., & Ismail, I. 1999. *Treatment of Drug Dependents in the Traditional Setting Case of Inabah*. Pakistan Journal of Psychological Research, Winter, 13 (3-4)
- Mohd Rushdan bin Mohd Jailani. 2013. *Terapi Psikospiritual Islam dan Pengalaman Pusat Pemulihan Dadah Berteraskan Islam*, Kertas Kerja Seminar Kebangsaan Penyalahgunaan Dadah.
- Ruslan. 2009. *Penyalahgunaan Dadah Dalam Kalangan Remaja*. Selangor: Penerbitan Minda Ikhwan.
- Sulaiman Abdul Aziz. 1416H. *Uslub al-Targhib fi Dakwah al-Nabi*, Riyadh : Wizarah Ta'lim al-Ali Jamiah al-Imam.
- Yusuf al-Qaradhawi. 1997. *Al-Halal wal al-Haram fi al-Islam*. Kaherah: Maktabah Wahbiah.